

通

紀

通紀卷第十一

唐高祖

太宗

高宗

則天

中宗

睿宗

元宗

肅宗

代宗

德宗

順宗

憲宗

穆宗

敬宗

文宗

武宗

宣宗

懿宗

僖宗

昭宗

哀帝

高祖神堯皇帝姓李氏諱淵隴西狄道人太祖景帝
諱虎孫代祖元皇帝諱昞第四子母元貞皇后獨孤
氏帝生於長安紫氣充庭神光照室體有三乳左腋
下紫誌如龍年七歲龍衣爵唐國公倜儻不羈豁達大
度率性剛直無所矯飾志略宏遠寬仁容衆凡所與

遊無貴賤皆得其懽心善相者史世良謂高祖曰公骨法非常必爲人主願自愛勿忘鄙言高祖頗以自負隋文帝獨孤后即高祖之從母由是文帝特親愛委以心腹嘗目高祖曰此兒體兒器度不可測也擢儀同三司車騎將軍歷譙隴岐三州刺史皆以恩惠見稱大業初爲榮陽樓煩二郡太守考績連最徵爲殿內少監轉衛尉少卿煬帝末年多所猜忌又以讖文有李氏膺運高祖乃縱酒納賂以晦其迹後因病不時朝謁煬帝曰可得死否高祖知之每懷危懼煬帝幸汾陽宮命高祖往山西河東黜陟討捕師次龍門賊帥毋端兒帥衆數千薄于城下高祖從十餘騎擊之射七十發皆應弦而倒賊乃大潰遷右驍衛

將軍十三年爲太原留守備禦爰屈太宗從在軍中
知隋將亡群盜四起潛圖義舉高祖初雖大驚後意
少解曰今日破家滅身亦由汝化家爲國亦由汝旋
遇煬帝遣使馳高祖送江都會有詔釋俄而馬邑校
尉劉武周據汾陽宮反太宗固請建義從之因集將帥
謂之曰武周號天子在近我輩不能制自當族滅矣將
如之何隋將王威高君雅及諸寮吏咸請集兵於是太宗
與晉陽令劉文靜門下客長孫順德劉宏基等各募
兵旬日之間衆且一萬王威等見兵大集相與疑懼
請高祖祈雨晉祠將爲不利太宗陰知其謀執而斬
之時慶雲見裴寂殷開山等請稱義兵准伊尹廢
太甲霍光廢昌邑故事遙尊煬帝爲太上皇立代

王侑以安隋室命太宗將兵徇西河下之始建大將軍
府以裴寂爲長史劉文靜爲司馬具設官屬置三軍
以公子建成爲隴西公左領大都督左統軍隸焉大
宗爲燉煌公右領大都督右統軍隸焉以公子元吉
爲大原留守高祖遂以兵四圍關中誓衆於太原之
野師以霍邑隋將宋老生拒義師不得進會霖雨餽
運不給高祖命旋師太宗切諫乃止有白衣老父詣
軍門曰余爲霍山神使謁唐皇帝曰八月雨止路出
霍邑東南吾當濟師高祖曰此神不欺趙無郵豈
負我哉乃以太牢祭霍山遂破宋老生於霍邑又破
陳叔達於絳郡紫雲如樓閣正當高祖軍上至龍門
縣河水清白狐見諸賊帥皆降關中向義者日以千

數高祖第三女嫁柴氏舉兵於司竹從弟神通舉兵於郵縣皆會熱屋高祖兵有三萬至長安有二十萬房玄齡杖策謁于軍門高祖至長樂宮京師留守衛文昇右翊衛將軍陰世師京兆郡丞滑儀狹代王侑以拒義師太宗帥師攻城京師平收隋圖書衛文昇先病死以陰世師滑儀拒義師並斬之率百寮備法駕尊代王為天子改大業十三年為義寧元年天子以高祖為丞相錄尚書事假黃鉞進封唐王萬機悉委焉尋遜位命太保蕭造等奉皇帝璽紱高祖辭讓百寮勸進至于再三乃從之即位太極殿改隋義寧二年為武德元年在位九年傳位太宗稱太上皇貞觀九年五月寢疾崩於大安宮年七十葬于獻

陵廟號高祖太穆順聖皇后竇氏祔焉高祖天縱宏
圖不拘小節性至孝初葬元貞太后時遇祁寒跣行
二十餘里足皆流血毀頓之極哀感行路有得時珍必
薦而後食凡所營為務從簡約禮重賓客不隔貴賤
必與同坐或延於內握手造膝悉若朋友賞賜金帛
無所愛惜凡有委遇推以赤心皆許便宜從事未嘗限
以文法由是銜命畢力向義者如流登極之後篤愛
故人遠方至者皆為之興加禮貴臣延同御榻辭意
款昵言必稱名于時軍國多務奏請填委剖決如流
每發軒伏皆出人意表其有故舊咸加升擢不限資
階敦睦宗親送迎如家人禮然撥亂之始王業初基
急於革弊未遑遷俗政存權務便合時宜任用宰

司爰及方鎮多委勲戚不暇求賢是以國憲規模未及宏遠末年衰老心默政事每見聞奏多所譴怒志求安靜遂傳位太宗焉

太宗皇帝諱世民高祖第二子母曰太穆皇后竇氏初在孕語聲聞於外后心異之生於武功之別館時慶雲見有二龍戲於館門之外三日而去年四歲有書生自云善相詣高祖云公有貴子因見太宗曰龍鳳之姿天日之表年將二十必濟世安民矣高祖乃陰採濟世安民之義以名焉

太宗聰明睿哲元鑒深

遠臨機果斷不拘小節時人莫能測也後遇煬帝於汾陽宮道次觀之謂所親曰大丈夫行當如是以吾察之其政已亂可得而圖也累從高祖破突厥拒摩山

飛賊

高陽地也
魏刀兒也

推鋒陷陣所向皆潰援高祖於重圍之

中其時羣盜蜂起太宗知隋祚將盡陰有濟世之志

降節下士推財養客無貴賤皆得其歡心至於群盜

大俠皆願効死力晉陽令劉文静坐李密事繫獄太

宗乃就繫所與之言陰圖義舉武德三年摠率諸將

攻王世充於洛邑世充求救於竇建德四年建德以

兵十餘萬來援世充太宗親率步騎三千五百人趣

武牢建德自榮陽西上築壘於板渚太宗屯武牢相

持二十餘日衆軍合戰器塵四起太宗率史大奈程

璣金秦叔寶宇文欽等纏幡而直入突出其陳後張

我旗幟賊顧見之大潰追奔三十里斬首三千餘級

虜其衆五萬生擒建德於陣太宗數之曰我以干戈問

罪本在王世充得失存亡不預汝事何故越境犯我
兵鋒建德股慄而言曰今君不來恐勞遠取高祖聞
而大悅手詔曰隋氏分崩峻函隔絕兩雄合勢一朝
清蕩兵旣尅捷更無死傷無愧爲臣不憂其父並
汝功也乃將建德至東都城下世充懼率其官屬一
千餘人詣軍門請降山東悉平太宗入據宮城令蕭
瑀竇軌等封守府庫一無所取令記室房元齡取隋圖
籍於是誅其同惡段達等五十餘人枉被繫囚禁者
悉釋之非罪誅戮者祭而誅之大饗將士班賜有差高
祖令左僕射裴寂勞於軍中六月凱旋太宗親披黃
金甲陳鐵馬一萬騎甲士三萬人前後部鼓吹俘二
僞主及隋氏器物輦輅獻於大廟高祖大悅行飲

至禮以享焉九年皇太子建成齊王元吉謀害太宗
六月太宗率長孫無忌尉遲敬德房元齡杜如晦宇文
士及等於元武門誅之立爲皇太子庶政日斷決太宗
遂傳位改元貞觀於是體三代之質文議百王之治
亂制禮作樂選賢任能與公卿大夫論量政事克勤
克儉恤獄慎刑放宮女三千人縱死囚二百九十人歸
家剪鬚以療李勣吞蝗以賑凶年凡厥美事溢於史
傳商功較德冠越唐虞以疾崩於含風殿年五十二在
位二十三年葬於昭陵廟號太宗文德皇后長孫氏
祔焉帝筆札之精弧矢之妙皆冠絕當時善屬文詞
體綺潤所著帝範金鏡威鳳賦並行於世而性本
仁孝侍膳問安於太上皇忘萬乘之貴能納諫爭敦

重名教四夷絕國自古○臣比日獻幣來庭畏威慕義
所謂太平之英主也

高宗皇帝諱治小名雉奴太宗第九子母文德長孫
皇后初授孝經於著作郎蕭德言太宗問曰此書中
何言爲善對曰夫孝始於事親中於事君終於立身
君子之事上也進思盡忠退思補過將順其美匡救
其惡太宗大悅曰此足以事父兄爲臣子矣皇太子
承乾廢帝由晉王而立爲皇太子太宗將伐高麗命
太子留鎮定州發有期悲啼累日因請飛驛遞表起
居并遞勅垂報並許之飛表奏事自此始也太宗崩
即位改元永徽于時太平之初制度大備帝躬親政
事禮敬勲賢凡所○爲率由典故六年廢至皇后立

武宸妃爲皇后貶褚遂良殺元舅長孫無忌納許敬宗之佞媚容李義府之奸邪皆武后之與奪也末年風疾與武后相坐聽政苟有可否必遭掣肘亦常憤惋竟不能廢宏道元年冬崩於首觀殿年五十六在位三十五年葬乾陵廟號高宗則天皇后武氏祔焉帝仁孝寬慈切於求理欽刑恤獄選賢與能至於修禪嶽之儀行耕藉之禮舉廢闕振淹滯命將出師蕩平荒梗借使不溺中宮之寵無傷晚歲之明亦守文之令主也

則天皇后武氏諱曁并州文水人工部尚書士彘女母楊氏年十四時太宗聞其美容止召入宮立爲才人太宗崩遂爲尼居感業寺大帝高宗於寺見之復召入宮

拜昭儀時王皇后蕭良娣與昭儀爭寵互讒毀之帝皆不納進號宸妃永徽六年廢王后而立爲皇后高宗稱天皇后稱天后后素多智計兼涉文史帝自顯慶已後多苦風疾百司表奏皆委天后詳決自此內輔國政數十年威勢與帝無異當時稱爲二聖及高宗崩皇太子即位尊天后爲皇太后臨朝稱制尋廢帝爲廬陵王遷於房州徐敬業聞帝見廢遂起兵作亂開臣復府令駱賓王草檄說后詞多不遜竟討平之垂拱二年初置匭於朝堂有進書言事者聽投之由是人間善惡事多所知悉載初元年依周制建子爲正月自以罌字爲名改詔書爲制書九月九日革唐命改國號爲周改元天授立武氏七廟冊廬陵

王爲皇太子賜姓武氏加尊號天冊金輪聖神皇帝
諸武子弟悉封王皆居要職后以女主登朝方行其
志慮大臣與李氏諸王不附於已欲逞其威任酷吏
來俊臣等罹□宗室及□朝臣誣其欲反前後誅數
千家內則太平公主之用事外則僧薛懷義及張易
之張昌宗兄弟之驕恣天下側目晚歲以張易之等
伏誅不復傳位武三思竟歸中宗后不豫崩於仙居
殿年八十三在位二十二年祔葬乾陵降周皇帝號依
前爲則天皇后后聰明英斷機略縱橫凡所擢用皆
稱其職雖唐祚幾移而政事不廢苟無大周之號
勿醜中遘之言則任妣馬鄧不足比也

中宗皇帝諱顯高宗第七子母曰則天皇后高宗

崩以皇太子即位改元嗣聖太后臨朝廢帝爲盧陵王徙房陵聖歷元年召還東都立爲皇太子時張易之與其弟昌宗潛圖逆亂鳳閣侍郎張柬之等定策誅之乃迎太子監國尋傳位改元神龍帝雖中興奸黨尚在不能革弊皇后韋氏恃寵欲尊天后故事與武三思馬秦客奸通干預政事官爵紊亂僧人謫佞宗楚客與后叶謀圖危社稷帝第四女安樂公主欲其母韋氏稱制求自立爲皇太女遂與馬秦客行鴆帝暴崩於神龍殿年五十五在位六年廟號中宗葬於定陵和思皇后趙氏祔焉帝仁懦無斷寵后所持幾覆宗祀賴元宗掃除內難不然唐祚□□韋氏之酷也

睿宗皇帝諱旦高宗第八子中宗母弟封豫王則天廢中宗立豫王爲皇帝及革命改國號爲周降帝爲皇嗣尋讓位中宗封相王以誅張易之兄弟功進封安國相王中宗崩太子重茂即位韋庶人專摠國政潛圖害帝臨淄王隆基率朝邑尉劉幽求等計捕韋氏及其黨與悉誅之公卿請擇長君於是少帝請叔父相王即位改元景雲先是中宗時官爵踰濫因依妃主墨勅而授官者時謂之斜封至是並令罷免以臨淄王爲皇太子尋傳位稱太上皇寢疾崩時年五十五在位五年廟號睿宗葬橋陵昭成皇后竇氏肅明皇后劉氏俱祔焉帝謙恭孝友好學草隸尤愛文字訓詁之書則天革命之辰韋

氏見謀之際契闊危難賴聖子建策重安宗社傳禪之美不亦宜乎

元宗皇帝諱隆基睿宗第三子母曰昭成皇后竇氏性英斷多藝尤知音律善八分書儀範偉麗有非常之表封楚王則天抱上高樓誤墜於地無虧損之狀天授年出閣開府置官屬年始七歲朔望車騎至朝堂金吾將軍武懿宗忌上嚴整訶排儀仗因欲折之上叱曰吾家朝堂於汝何事敢迫吾騎從則天特加寵異改封臨淄王出爲潞州別駕境有黃龍白日升天出畋有紫雲在其上從者望而得之中宗將祀南郊來朝京師將行使術士韓禮筮之著一莖孑然獨立所過之處輒有大人跡見州人皆異之中宗崩溫王即

位韋后臨朝與韋溫等將害睿宗帝與朝邑尉劉幽
求等建策率羽林兵斬關入宮誅韋后內難既平睿
宗即位以帝有大功捨長子宋王器而以為太子尋
傳位改元開元帝內難初平皇基再立前代積弊並
務改更求賢審官與之共理躬親庶政日昃忘疲二
十年間致太平也然後脩廢闕出淹滯禮樂文物上
超三代登封告類巡省四方游瑞日臻年穀豐稔四夷
即序五兵不興蕩蕩魏魏比肩堯舜天寶之後委政
將相稍務宴安是時李林甫用事楊貴妃專寵后黨
既進小人漸熾於是安祿山以誅國忠為名自幽州舉兵
犯闕潼關不守車駕幸蜀至馬嵬頓六軍不進請誅
楊氏於是誅國忠賜貴妃自盡車駕將發留太子宣

諭百姓肅宗即位靈武尊帝為太上皇洎收復京都
命韋見素迎帝歸闕三秦父老歡呼泣涕肅宗攬轡
入居南內寢疾崩於神龍殿年七十八在位四十五年
廟號元宗葬泰陵元獻皇后楊氏附焉帝孝慈兼
備友愛昆弟五人同帳無復猜忌深達元理多致異
人親注道德經孝經仍著定開元禮頒行天下精窮
音律古今無儔肅宗為太子頻為楊妃李林甫等搖
動而上不從史論□□尊謚曰明不亦宜乎又有天
寶故事元宗移太內安置後遂辟穀服氣張白皇后進
櫻桃蔗漿水乘心不食帝玩一紫玉笛自吹數聲有雙鶴
下庭徘徊而去聖皇謂持節者宮愛曰吾奉上帝
所召為元始孔昇真人此笛非汝所寶送與代宗即

令具湯沐我若就枕慎勿驚我宮愛聞眠中有聲
頗甚驚候之崩矣

肅宗皇帝諱亨元宗第三子母元獻皇后楊氏仁
愛英悟得之天然及長聰敏疆記屬蜀辭與麗耳目之
所聽覽不復遺忘元宗幸蜀留上在後宣諭百姓
衆泣而言曰逆徒背恩主上播越臣等請從太子收
復長安上回至渭北將渡渭水無舟楫於水上涉過
有雲氣成樓閣至平涼郡蒐閱監牧公私馬得數萬
疋上在平涼未知所適會朔方留後杜鴻漸等勸上
治兵於靈武以圖進取上然之上初發平涼有雲彩
浮空白鶴前引出軍之後有黃龍自上所□屋騰空
而去上行至豐登寧見蕃河天塹之固欲整軍北渡以

保豐寧寧忽大風飛砂跬步之間不辨人物及回軍趨靈武風砂頓止天地廓清上至靈武鴻斬等進曰今寇逆亂常主上奉蜀宗社神器須有所歸萬姓容容思宗明聖天意人事固不可違願殿下順其樂推以安社稷上曰候平寇逆奉迎鑿輿從容儲闈侍膳左右豈不樂哉公等何恣恣也凡六上牋上不獲已從之即位於靈武遥尊元宗爲太上皇改元至德安祿山僭稱大燕據洛陽爲子慶緒所殺元帥廣平王豫率兵十五萬討賊斬首六萬級入長安又東收河洛捷書繼至駕至鳳翔還京邑遣韋見素入蜀迎上皇上皇發蜀郡帝至望賢宮奉迎上皇御宮南樓帝再拜蹈舞稱慶上皇下樓帝匍匐上皇足涕泗嗚咽

不能自勝帝乘馬前道自開遠門至丹鳳門夾道
士庶舞抃路側皆曰不圖今日再見二聖中興之初
兵難未弭孜孜機務至于焦勞遂得疾崩年五十
二在位六年與上皇崩相去十四日廟號肅宗葬於
建陵章敬皇后吳氏祔焉

代宗皇帝諱豫肅宗長子母曰章敬皇后吳氏宇
量宏深寬而能斷喜愠不形於色仁孝溫恭動必由
禮幼而好學尤專於易元宗鍾愛之封廣平王爲
嫡皇孫初爲天下兵馬元帥破安祿山收復兩京立
爲皇太子肅宗大漸所幸張皇后無子陰引越王係
將圖廢立帝勒兵誅之幽張后於別所肅宗崩即
位柩前楚州進寶上舊封楚王改元寶應以奉節

王适爲天下元帥李輔國號尚父帝有弱成中興之功多難之後躬勤庶政于時河朔雖平諸侯專恣西番侵逼京師百姓勞役又避吐蕃幸于陝郊萬機□委國力殫竭因寢疾崩年五十五在位十四年廟號代宗葬於元陵睿直皇后沈氏真懿皇后獨孤氏祔焉德宗皇帝諱适代宗長子母睿真皇后沈氏封雍王時史朝義據東都上會軍陝州討賊破賊於洛陽進收東都河南平定朝義走河北分命諸將追之俄而賊將李懷仙斬朝義首以獻河北平以元帥功拜尚書令與郭子儀等八人圖形凌煙閣廣德二年立爲皇太子代宗崩即位改元建中詔山南枇杷江南相橘歲一貢以共宗朝餘貢皆停以司徒郭子儀加號

尚父帝躬親政事性急多疑徵涇原節度使姚令
言領兵救哥舒曜於襄城涇原之師出京城至漘
水倒戈謀叛令言不能止帝幸奉天朱泚據京城帝
賜李懷光鐵券懷光怒反車駕幸梁州詔以梁州為
興元府李晟集兵賦討懷光朱泚事平駕自興元
歸闕時渾瑊等以其眾扈從李晟等以其眾奉迎
步騎十餘萬旌旗連亘數十里都民僧道歡呼感泣賜李
晟女樂八人永崇里第命宰臣送晟入新第京師以
為榮觀末年宰輔悉比皆備負蓋多疑惑由是政事
無序帝好文學又好為詩以賜臣下寢疾崩年六十五
在位二十五年廟號德宗葬宗陵昭德皇后王氏
祔焉

順宗皇帝諱誦德宗長子母昭德皇后王氏以皇太子即位改元永貞帝寬仁有斷禮重師傅見即先拜尤善隸書德宗工爲詩每賜大臣方鎮詩制必命書之從幸奉天賊泚逼迫帝身先禁旅乘城拒戰督勵將士無不奮激德宗在位歲久稍口假權宰相左右倖臣如裴延齡李齊運韋滄李平等等因閒用事刻下取功而排陷陸贄張滂輩人不敢言帝從容論諍故率不任延齡等爲相嘗侍宦魚藻宮張水嬉綵艦雕靡宮人引舟爲擢歌絲竹間發德宗歡甚帝引詩人歌好樂无荒爲對居東宮二十年風病不能言暨德宗不豫上卧病不能得侍德宗彌留意見上涕咽德宗崩大行發喪人情震懼上力疾裹服見百寮

既即位知社稷有奉中外始安尋傳位太子稱太上
皇崩興慶宮年四十六在位一年廟號順宗葬豐陵
莊憲皇后王氏祔焉

憲宗皇帝諱純順宗長子母莊憲皇后王氏六七歲
時德宗抱置膝上問曰汝誰子在吾懷對曰是第三
箇天子德宗異而憐之順宗即位為皇太子乃傳位
焉改元元和於時諸侯跋扈專據土宇命將出師繼
推凶醜破吳元濟於淮西擒李錡於浙右平李師道
於鄆州伐劉闢於成都四罪而天下咸服因餌金石
藥崩年四十三在位十五年廟號憲宗葬景陵孝明
皇后鄭氏懿安皇后郭氏祔焉

穆宗皇帝諱恒憲宗第三子母懿安皇后郭氏以

皇太子即位改元長慶帝以宰相皇甫鎛奸邪連結
內官不俟聽政而逐之士君子相賀於朝百姓相賀
於市山人柳泌僧大通輒懷左道上感先朝各決放
處死帝遊幸過度錫賚倍多倡優宦官無名受賜
大闢用權朝士皆附諫官抗疏終不聽納寢疾倉卒
而崩年三十在位四年廟號穆宗葬光陵宣懿皇后
韋氏祔焉

敬宗皇帝諱湛穆宗長子母恭僖皇后王氏以皇
太子即位改元寶曆帝口聰睿有斷善騎射百工之
藝不習而能荒於聲樂賜與過差深夜自捕狐狸
謂之打夜狐好褻近群小與中官劉克明等二十
八人夜宴帝入室更衣殿上燭忽滅克明等行逆而

崩矯制立絳王悟勾當軍國事帝年十八在位三年廟號敬宗葬莊陵皇后郭氏祔焉

文宗皇帝諱昂穆宗第二子母貞獻皇后蕭氏封江王敬宗爲蕭蕭佐明等所害矯詔立絳王悟勾當軍國事樞密使王守澄中尉梁守謙率禁軍討賊誅絳王迎帝於江邸百寮勸進即位改元太和登祇旬日弊事盡去中年風恙王守澄進術士鄭注宰相李宗閔與從子仲言託附王守澄共譖李德裕出鎮後奸邪遞結在位十四年不康詔穎王湮爲皇太弟崩年三十三廟號文宗葬章陵王德妃楊賢妃劉貴妃祔焉帝恭儉儒雅出於自然承父兄奢弊之餘當閭寺撓權之際而能以治易亂化危爲安太和之初可謂明

矣帝在藩時喜讀貞觀政要每見太宗孜孜政道有意于茲即位之後每延英對宰臣率漏下十一刻故事天子隻日視事帝謂宰輔曰朕欲與卿每日相見其輟朝放朝用隻日可也時憲宗郭后居興慶宮曰太皇太后敬宗母寶曆止太后及上母肅太后時呼三宮太后帝性仁孝三宮問安其情如一嘗內園進櫻桃所司啓曰別賜三宮太后帝曰太后宮送物焉得爲賜遽取筆改賜爲奉宗正寺祭器朽故請易之及有司呈進命陳于別殿具冠帶而閱之容色悽然尤勤于政理凡選內外群官宰府進名帝必面訊其行能然後補除中書用鴻臚卿張賈爲衢州刺史賈好博朝辭曰帝謂之曰聞卿善長行對曰政事之餘聊與賓客爲戲

非有所妨帝曰豈有好之而無妨耶內外聞之悚然
而帝以累世變文起禁闈尤側目於中官欲盡除之然
□□狂狡之流制御無術□□既悞幾致顛危所謂
有帝王之道而無帝王之才雖旰食焦憂不能弭患
惜哉

武宗皇帝諱炎本名漣穆宗第五子母宣懿皇后韋
氏文宗崩遺詔以太弟即位改元會昌先是迴鶻有
靈武之功朝廷優待至是愈甚驕恣侵暴府縣乃用
李德裕謀凡在京迴鶻並配諸道然後命幽州張仲
武大破之迎太和公主生還自秦漢而來未有□還
公主也劉從諫鎮上黨薨其子稹等專竊土宇命
大將石雄平之釋氏渝濫文宗雖行釐革不能禁止

帝乃下制沙汰僧尼三十萬勒歸農桑嫁娶帝英
剛斷宸慮□□視朝聽政唯善是從彊侯畏服戎
夷龍言伏雄謀未盡奄聞殂落年三十三在位六年葬
端陵廟號武宗德妃王氏祔焉

宣宗皇帝諱忱憲宗第十三子母孝明皇后鄭氏封
光王武宗疾篤遺詔立帝爲皇太叔武宗崩即位柩
前改元大中帝器識深遠久歷艱難備知人間疾苦
自寶曆已來中人擅權京師豪右大擾窮民泊大中
臨馭一之日權豪斂迹二之日姦臣畏法三之日閭
寺釐言氣由是刑政不濫賢能効用百揆四歲穆若清
風十餘年間頌聲載路上宮中衣澣濯之衣常膳不
過數器非母后侑膳輒不舉樂歲或小饑憂形於色

雖左右近習未嘗見怠惰之容與群臣言嚴然煦接如侍賓僚或有所陳口虛襟聽納舊人主所行黃門先以龍腦鬱金藉地上悉命去之曾授道錄有烟鷲呈祥在位十四年寢疾詔立鄆王為皇太子崩年五十廟號宣宗葬貞陵元昭皇后曰晁氏祔焉

懿宗皇帝諱漼宣宗長子母元昭皇后晁氏封鄆王自皇太子即位改元咸通帝次女兒瓌係有異稠人藩邸時經重疾苗龍出入卧內又大雪深數尺帝寢室之上獨無人皆異之宣宗制秦邊郵樂曲詞有海晏咸通之句又京城小兒疊布漬水口之向日謂之拔暈帝果以鄆王即大位以咸通為年號上好宴游每三扈從供帳動計三萬人羊破萬三千口郭妃權萬機與

內作使郭敬述宰相韋保衡等荒穢擬傾皇祚別立
太子事泄誅戮貶降內外方安在位十四年崩年四十一
廟號懿宗葬簡陵惠安皇后王氏祔焉嘗禮觀音
像陷地四尺上訝之左右對曰天子唯拜天地菩薩邊
地脩行者故不合銷上大悅

僖宗皇帝諱儂懿宗第五子母惠安皇后王氏封普
王後立為皇太子懿宗崩即位改元乾符付帝聰惠書
史一覽無遺亦好畋遊棊博弧矢音律筭法無不精
妙能調亞馬輪劍盤槍率比旨神捷方在冲幼聰而不
明百揆萬機委於軍容使田令孜輕侮典章凌慢宰執
中外結舌黃巢反入南海殺節度使李迢帝命大尉
高駢討伐不克巢上表言詞悖慢決意犯闕口反京

都帝倉惶幸蜀黃巢僞號大齊李克用追攻巢巢
道巢將林言斬巢收復京師車駕自蜀還田令孜復
用口離間藩鎮沙陀逼京師令孜奉車駕幸興元
邠州節度使朱玫立襄王煚為天子立七月王行瑜
斬朱玫王重榮李煊等迎駕還至鳳翔暴疾詔弟傑
勾當軍國事崩年二十七在位十八年葬靖陵廟號
僖宗恭獻皇后王氏附焉

昭宗皇帝諱煜初名傑懿宗第七子僖宗母弟封
壽王僖宗崩以大弟即位改元龍紀帝攻書好文尤
重儒術神氣雄俊以先朝威武不振國命侵微而
尊禮大臣詳延道術意在恢張舊業號令天下即
位之初人皆稱之王行瑜李茂貞韓建等稱兵詣闕

車駕幸河中李克用逐之迎帝還宮李茂貞復犯闕
帝駐蹕華州天下文武百寮請車駕還京帝自華州
還宮後頗以貪酒肆意喜怒不常上獵苑中醉甚手
殺黃門侍女數人劉季述王仲先廢帝幽於東內橋
宣帝命稱上皇令皇太子裕即位孫德昭等殺仲先
帝反正孫德昭執劉季述亂捧擊死降太子裕爲德
王汴帥朱全忠逼帝幸洛陽從上者唯小黃門十數
打球供奉內園小兒共二百餘人全忠仍慮此輩爲變
並坑之由是帝左右別後皆汴人也又命朱友恭等
殺帝於椒殿年三十八在位十七年廟號昭宗葬和陵
積善皇后何氏附焉

哀帝諱祝昭宗第九子母積善皇后何氏封輝王

昭宗崩即位改元天祐帝每見梁王皆號泣問上皇所
在梁王亦懼先是將元暉張延範朱友恭等為梁
王腹心俛居近職伺上動靜將元暉因事到夷門全
忠議及禪讓元暉以天下未歸更請籌度全忠大怒誣
以行逆斬之元暉吳人也全忠置為樞密資其內助
然以哀帝危感有匡復之意大節未伸良可痛也
全忠後令河南府孔目官臧延範伸劔害王太后于
上陽宮帝在明堂聞后暴崩絕號數日尋遷於曹
州隨駕朝士宮監共四十五人供帳寂寞飲食麤糲初
到郡為池蛙所聒命取一頭口之曰若李氏復興爾輩
依前大鳴不然則勿鳴翌日視池中並死而浮出人
謂唐祚自此絕矣天祐五年二月二十一日為全忠所

害謚曰哀帝後唐明宗追謚昭宣光烈孝皇帝廟號景宗陵曰溫陵

右唐自高祖至哀帝通則天共二十一帝二百八十九年入梁安祿山營州柳城雜種蕃人本無姓氏名軋犖山母阿史德氏亦突厥巫師以下爲業突厥呼鬪戰爲軋犖山遠以名之少孤隨母在突厥中將軍安波至兄延偃妻其母開元初與將軍安道買男俱逃出突厥中道買次男貞節爲嵐州別駕收護之年十餘歲以與其兄及延偃相携而出感媿之約與思順等並爲兄弟冒姓爲安及長解六蕃語爲互市牙郎張守珪爲幽州節度祿山盜羊事覺守珪口口欲棒殺之大呼曰大夫不欲滅兩蕃耶何爲杖殺祿山守珪見其

肥白壯其言而釋之拔爲偏將常言其肥祿山畏守
珪不敢飽食以驍勇聞遂養爲己子爲平盧兵馬使
性巧密人多譽之授營州都督平盧軍使厚賂往來
者乞爲好言元宗始信之天寶元年以平盧爲節度
以祿山攝中丞爲之入朝奏事元宗益寵之後請爲
貴妃養兒入對皆先拜太真元宗怪而問之對曰臣
是蕃人蕃人先母後父元宗大悅遂命揚銘以下並
約爲兄弟晚年益肥肚垂過膝重三百三十斤每行
以肩脾左右擡挽其身方能移步至元宗前作蕃
旋舞疾如風爲河東節度使祿山陰有逆謀於范陽
北築雄武城外以禦寇內貯兵器積穀時揚國忠屢
奏祿山必反元宗使中官輔璆琳覘之得賄賂盛言

其忠國忠又去追必不至洎追之而至謁於華清宮因
涕泣言曰臣蕃人不識字陛下擢臣不次楊國忠必
欲殺臣元宗益親厚之遂以爲左僕射却回歸范陽
疾行出關日三四百里至范陽人言反者元宗必大
怒縛送與之元宗又召之辭疾不至天寶十四載十一
月反於范陽矯稱奉恩命以兵討逆賊楊國忠以諸
蕃馬步十五萬夜半行平明食日六十里天下承平日
久人不知戰聞其兵起朝廷震驚渡河次于颯子谷
將軍荔非守瑜邀而射之殺數百人守瑜箭盡投河
而死十五年正月祿山僭位燕國立年聖武關門不
守元宗幸蜀太子收兵靈武祿山以體肥常帶瘡及
造反後眼漸盲至是不見物又得疽疾及至德二年

以疾加躁急動用斧鉞謀主嚴莊亦被箠撻莊正月五日夜立慶緒於戶外莊領豎李豬兒直入祿山懷內豬兒以大刀斫其腹祿山眼無所見牀頭常有佩刀及覺難作捫牀頭不得但振幄柱大呼曰是我家賊腹腸已數斗流在牀上言訖氣絕因掘牀下深數尺爲坎以殮裹其尸埋之子慶緒立史思明曰爾爲人子殺汝父以求位庸非大逆乎縊殺之祿山父子替逆三年而滅

史思明本名罕于營州寧夷州突厥雜種蕃人安祿山同鄉里及長相善以驍勇聞初事特進烏知義每令輕騎胡賊必生擒以歸又解六番語與祿山同爲互市牙郎張守珪爲幽州節度奏爲折衝天寶初願

立戰功至將軍知平盧軍事安祿山反命思明討饒陽等諸郡陷之與蔡希德圍顏杲卿於常山九日拔之又圍饒陽二十九日不能拔李光弼出土門收常山郡思明解圍而拒光弼光弼列兵於城南相持累月朔方節度使郭子儀自土門以朔方蕃漢二萬人自土門至常山軍威遂振南收趙郡思明退保博陵子儀光弼擊之敗思明於沙河上潼關失守肅宗理兵於朔方使中官邗延思追朔方河東兵馬光弼入土門思明隨後邀擊之已而回軍併行擊劉正臣正臣易之初不設備遂弃軍保北平正臣妻子及軍資車二千乘盡沒思明又攻河間顏真卿使和琳以一萬二千人馬百匹以救之至河間二十餘里北風勁烈

鼓聲不相聞賊亂擊之擒和琳至德二年思明以
蔡希德合范陽上黨兵馬十萬圍李光弼於太原光
弼使爲地道至陣前賊方戲弄城中人地道中人擒而
曳之賊以爲神呼爲地藏菩薩思明留十月會安祿
山死慶緒令歸范陽希德留百餘日竟不能拔而歸
慶緒爲三帥所敗投鄴郡其下蕃漢兵三萬人不知所
從思明擊殺三千人然後降之慶緒使阿史那承慶
安守忠徵兵於思明且欲圖之判官耿仁智忠諒之士
謂思明曰大夫崇重人不敢言仁智請一言而死思明
曰試言之對曰大夫久事祿山祿山兵權若是誰敢不
服如大夫比者逼於兇威耳固亦無罪今聞孝感皇帝
聰明勇智有少康周宣之略大夫發使輸誠必開懷見

納此轉禍爲福之上策也。思明曰：善。承慶等以三千騎至范陽。思明悉衆介冑以逆之。衆且數萬去之一里。使人謂之曰：相公及王遠至，將士等不勝喜躍。此皆邊兵怯懦，頗懼相公之衆，莫敢進也。請弛弓以安之。從之。思明遂以承慶守忠，入內廳飲樂。因即拘承慶斬守忠。李立節之首，李光弼使衙官敬悅招之。遂令衙官竇子昂奉表以所管兵衆八萬人兼以僞河東節度高秀巖來降。肅宗大悅，封歸義王。范陽長史御史大夫河北節度使朝義已下，並爲列卿。秀巖雲中太守。明年改元乾元。肅宗使烏承恩爲副使，圖思明。而殺之。承恩至范陽，數漏其情。夜取婦人衣詣諸將家，以翻動之意諭之。諸將以白思明，甚懼，無以爲驗。

有頃承恩從上京來宣恩命畢將歸私第思明留承
恩宿於館中明當有所議已令帟其所寢之床伏二
人於下承恩先有小男留范陽思明令省其父夜半
私語其子曰吾受命除此逆蕃便授吾節度矣牀下
二人叫呼而出以告思明思明執之榜殺承恩父子
又有使從京至執三司議罪人狀思明曰陳希烈已下
皆重臣上皇棄之幸蜀旣收復天下此輩當慰勞
之今尚見殺况我等本從祿山反乎乃令耿仁智張
不矜脩表請誅光弼以謝河北若不從臣請臣則
自領兵徃太原誅光弼不矜初以表示思明及封
入函耿仁智盡削去之寫表者密告思明思明大
怒執二人於庭曰汝何得負我命斬之仁智事思明

頗久意欲活之却令召入謂之曰我往使汝已三十年今日之事我不負汝仁智大呼曰人生固有一死死須存忠節今大夫納邪說爲反逆之計縱延歲月不如早死請速加斧鉞思明大怒亂捶殺之軋元二年正月思明於魏州設壇僭稱大聖燕王召慶緒等殺之併有其衆四月僭稱大號以周贄爲相以范陽爲燕京九月陷洛陽與大尉光弼相拒思明次行兗暴下無聊矣上元二年潛遣人反說官軍曰洛中將士皆幽朔人咸思歸魚朝恩以爲然告光弼及諸節度僕固懷恩衛伯玉等討賊光弼等然之乃出師口口口進次榆林賊委物僞逐將士等不復設備皆入城虜掠賊伏兵在北邙山下因大下士卒咸弃甲奔散魚

朝因心衛伯王退保陝州光弼懷思心奔河陽城退居聞
喜步兵殺死者數千人軍資器械盡爲賊所有思明
至陝州爲官軍所拒於姜子坂數不利退歸永寧築三
角城約一日而畢以貯軍糧朝義築城未畢而思明
至詔之對曰緣兵士疲乏暫歇耳又怒曰汝惜部下
兵違我處分令隨身數十人立馬而泥斯須而畢又
曰待收陝州即斬此賊朝義將駱悅尹許驥男季常
等因言發興之事古來有之喚取曹將軍計大事可
乎朝義迴面不應王悅曰若不應悅等即歸李家王
亦不全矣朝義然之令許季常命曹將軍至悅等告
之不敢拒其夜思明夢而驚悟據床惆悵每與伶人
寢食置左右以其殘忍心皆恨之及此問其故曰向夢

兒水中沙上羣鹿渡水而至鹿死水乾言畢如廁伶人相謂曰鹿者祿也水者命也虜祿命俱盡矣駱悅入問思明所在未及對殺數人因指在廁思明覺變踰牆出至馬槽韉馬騎之悅等至今周子俊射中其臂落馬曰是何事悅等告以懷王思明曰我朝夾語錯合有此事然汝殺我太疾何不使我收長安口事不成矣因急呼懷王者三曰莫殺我却罵曹將軍曰者虜誤我者虜誤我悅遂令口手擒思明赴柳泉驛曰事已成矣朝義曰莫驚聖人否莫損聖人否悅曰無時周贄許驥統後軍在福昌朝義令許季常往告之贄聞警欲仆倒朝義領兵廻贄等來迎因殺贄田思明至柳泉驛縊殺之朝義僭偽位朝義思

明孽子也寬厚人附之使人殺偽太子朝英等諸節
度使皆思明等夷朝義徵召不至代宗遣元帥雍王
領河東朔方兵馬赴陝僕固懷恩與迴紇左殺為先
鋒魚朝恩郭英又為後殿自澠池入李抱玉自河陽
入副元帥李光弼自陳留入雍王留陝州二十九日與
朝義戰于北邙山下逆賊敗績走渡河斬首萬六千
生擒四千六百降三萬二千委器械不可勝數朝義
走投汴州汴州偽將張獻誠拒之乃渡河北投幽州
二年正月賊偽范陽節度使李懷仙於莫州生擒之
送款來降梟首至闕下思明乾元二年僭號至朝
義寶應元年滅凡四年

朱泚幽州昌平人曾祖利贊善大夫祖思明太子洗

馬父懷薊州刺史平盧軍留後柳城軍使大歷元年卒泚以父資從軍幼壯偉膏帶十圍騎射武藝亦不出人外若寬和中頗殘刃心然輕財好施每征戰所得賞物輒分麾下將士以是爲衆所推故得濟其兇謀初隸李懷仙爲十將改經略副使朱希彩旣殺李懷仙自爲節度以泚宗姓甚委信之希彩爲政苛酷人不堪命大歷七年爲孔目官李懷瑗所殺衆無所從因共推泚泚遂權知留後遣使奉表京師代宗拜檢校左散騎常侍幽州盧龍節度等使又上表令弟滔率兵二千五百人赴京西防秋代宗嘉之手詔褒美九年加戶部尚書賜實封百戶幽州及河北諸鎮自天寶末便爲逆亂之地李懷仙朱希彩與連

境三節度名雖向順未嘗朝謁至是泚率先上表請自領步騎三千人入覲詔修甲第以待之九月泚至京師上表請留京師從之授其弟滔幽州節度留後仍以汴宋淄青兵俾汝統焉加同平章事出鎮奉天十二年加檢校司空代李抱玉爲隴右節度使德宗嗣位加太子太師鳳翔尹建中元年涇州將劉文喜口兵爲亂加泚四鎮北庭行軍涇原節度使與諸軍討伐涇州平加中書令還鎮鳳翔二年加泚太尉朱滔將反陰使人與泚計議以帛書內臘丸中置髮鬚間河東節度馬燧搜獲之以聞并送帛書及所遣使泚惶懼頓首乞歸罪有司上勉之曰千里不同謀非卿之過三年以張謚代泚爲鳳翔留後留泚京師四年

涇原兵叛鑿駕幸奉天叛卒等以泚嘗統涇州知其失權廢居怏怏思亂群寇無帥幸泚政寬乃相與謀曰朱太尉久囚空宅若迎而爲主事必濟矣姚令言乃率百餘騎迎泚泚乘馬擁從北向入居含元殿明日移處白華但稱太尉朝官有謁泚者悉勸奉迎鑿駕源休至勸其僭僞泚甚悅之又李忠臣張光晟繼至咸以宮門積憤樂於禍亂鳳翔涇原大將張廷芝段誠諫以潰卒三千餘自襄城至賊泚自謂衆望所集僭竊之心自此而定段秀實久失兵柄推心委之遂發銳師三千言奉迎乘輿實陰有逆謀秀實與劉海賓謀誅泚且虞叛卒之震驚法駕乃潛爲賊符追所發兵至六日兵及駱驛而至因與海賓同入見泚

爲陳逆順之理而海賓於靴中取匕首爲其所覺秀
實知不可以義動遽奪源休象笏挺而擊此仍大呼
曰反虜萬斬此舉臂衛首秀實格扯之恟恟然李
忠臣馳助此此亦不多力纔破其面逆徒譟集秀實海
賓遂併見害源休姚令言李忠臣張光晟等八人導
此自白華入宣政僭即僞位自稱大秦皇帝年號應
天以其兄子遂爲太子遥封弟滔爲翼王尋號皇太
弟此自領兵侵逼奉天竊威儀輦輅聞益道途蟻
聚之衆軍勢頗盛以姚令言爲元帥張光晟爲副軍
合於城下渾瑊韓游瓌禦之此衆大敗十一月三日杜
希全與此衆戰于莫谷官軍不利自是賊衆驕怠王
師乘城而戰人百其勇力賊多敗衄或出野戰官軍又

獲利焉。泚乃大驅百姓填塹，夜攻城。城中設竒以應之。賊乃退縮。西明寺僧法堅有巧思，爲泚造雲梯十五。日辰時，梯臨城東北隅。城內震駭。渾瑊侯仲莊設大坑爲地道，陷之又縱火焚其梯。須臾，雲梯與兇黨同爲灰燼。其夜，兵復出攻泚，衆敗績。李懷光以五萬人來援，自河北至泚，衆惶駭，因而大潰。長圍遂解。衆庶以懷光三日不至，城則危矣。二十日夜，泚走至京城，使人僞自城外來，周走號令曰：「奉天已破，百姓聞之莫不飲泣。泚自號其宅曰潛龍宮，悉移內庫珍貨以實之。識者曰：『易稱潛龍勿用，此敗徵也。』無幾，百姓剽奪其珍寶，泚不能禁止。明年正月一日，泚改僞國號曰漢，稱天皇帝。元年二月，太子懷光旣圖叛逆，遣使與泚通。

和□□□□□懷光初與泚往復通好甚密以錢穀
金帛互相饋遺泚與書事之如兄約云削平關中當
割據山河永爲鄰國及懷光決計背叛逼乘輿遷幸
泚乃下偽詔書待懷光以臣禮仍徵兵馬懷光旣爲
所賣斬心怒憤耻遂領衆道歸河中三月李晟駱元光
尚可孤之衆悉於城東累敗泚衆五月二十八日官軍
入□收京師逆黨大潰泚與姚令言張庭芝源休李
子平朱遂以數千人西走其餘黨或奔竄或來降泚
衆緣路潰散乃奔涇州繞百餘騎而已泚將梁庭芬從
泚至寧州彭原縣西城屯復與泚心腹朱惟孝共射
泚泚走墜故窖中泚左右斬泚使宋應傳首以獻泚
死時年四十三

黃巢曹州冤句人本以販鹽爲事乾符中仍歲凶荒人飢爲盜河南尤甚初里人王仙芝尚君長聚盜起於濮陽攻剽城邑陷曹濮及鄆州先有謠言云金色蝦蟆爭努眼翻却曹州天下反及仙芝盜起時議畏之詔左金吾衛上將軍齊克讓爲兗州節度使以本軍討仙芝仙芝懼引衆歷陳許襄鄧無少長皆虜之衆號三十萬三年七月陷江陵十月又遣將徐唐莒陷洪州時仙芝表請符節不允以神策統軍使宋威爲荆南節度招討使中使楊復光爲監軍復光遣判官吳彥宏諭以朝□□□別加官爵仙芝乃令尚君長蔡溫球楚彥威相次詣闕請罪且求息命時宋威害復光之功並擒送闕勅於狗脊嶺斬之賊怒悉精

統擊官軍威軍大敗復光收其餘衆以統之朝廷以王鐸代爲招討五年八月收復荊州斬仙芝首獻於闕下先是君長弟讓以兄奉使見誅率部衆入查牙山黃巢黃揆昆仲八人率盜數千依讓月餘衆至數萬陷汝州虜刺史王鐸大掠關東官軍加討屢爲所敗其衆十餘萬尚讓乃與群盜推巢爲王曰衝天大將軍仍署官屬蕃鎮不能制時天下承平日久人不知兵僖宗以幼主臨朝號令出於臣下南衙北司迭相矛盾以至九流濁亂時多朋黨小人譏勝君子道消賢豪怨憤退之草澤旣一朝有變天下離心巢之起也人士從而附之故巢馳檄四方章奏論列皆指斥朝政之弊蓋士不逞者之辭也巢徒黨旣盛與仙芝爲影

援及仙芝敗東攻亳州不下乃襲破沂州據之仙芝餘黨悉附焉時王鐸雖銜招討之權緩于攻取時高駢鎮淮南表請詔討賊許之議加都統巢乃渡淮僞降于駢駢遣將張璘率兵受降于天長鎮巢擒璘殺之因虜其衆尋南陷湖湘遂據交廣託越州觀察使崔瑒奏乞天平軍節度朝議不允又乞除官時宰臣鄭畋與樞密使楊復恭奏欲請授同正員將軍盧攜駁其議請授率府率如其不受請以高駢討之及巢見詔大詬執政又自表乞安南都護廣州節度亦不允然巢以士衆烏合欲據南海之地永爲窠穴坐邀朝命是歲自春及夏其衆因疫死者十三四衆勸請北歸以圖大利巢不得已廣明元年北踰五嶺犯湖相江浙遙

逼廣陵高駢閉門自固所過鎮戍望風降賊九月渡淮十一月十七日陷洛陽留守劉亢章率分司官迎之繼攻陝虢逼潼關陷華州留將喬鈴守之河中節度使李都詐進表于賊朝廷以田令孜率神策博野等軍十萬守潼關時禁軍皆長安富族世籍兩軍豐給厚賜高車大馬以事權豪目少迄長不知戰陣初聞科集父子聚哭憚於出征各於兩市出直萬計傭雇負販屠沽及病坊窮人以為戰士操刀執戟不知鍛銳復任宦官為將帥驅以守關關之左有谷可通行人平時捉稅禁人出入謂之禁谷及賊至官軍但守潼關不防禁谷以為谷既官禁賊無得而踰也尚讓林言率前鋒由禁谷而入夾攻潼關官軍大潰十二月三日

僖宗夜自開遠門出趨駱谷五日賊陷京師十三日賊陷京師十三日賊巢僭位國號大齊仍御樓宣赦且陳符命曰唐帝知朕起義改元廣明以文字言之唐已無天分矣唐去丑口而安黃天意令黃在唐下乃黃家日月也土德生金子以金王宜改年金統選驍勇形體魁梧者五百人曰功臣令其甥林言爲軍使比之控鶴中和元年二月尚讓寇鳳翔鄭畋出師德宗之大敗賊於龍尾坡畋乃馳檄告喻天下藩鎮四月涇原行軍唐宏夫之師屯渭北河中王重榮之師屯沙苑易定王處存之師屯渭橋鄜延拓拔思恭之師屯武功鳳翔鄭畋之師屯葢屋六月邠寧朱玫之師屯興平忠武之師三千屯武功是歲諸侯勤王之師四面俱會十

二月宰臣王鐸率荆襄之師自行在至鄭敗帳下小
校竇玫者驍敢無敵每夜率敢死之士百人直入京
師放火燔諸門斬殺而還賊人悚駭時京幾百姓皆
若於山谷累年廢耕耘賊坐空城賦輸無入穀食騰
踴米斛三十千官軍皆執山砦百姓粥鬻於賊爲食人
獲數十萬朝士皆往來同華或以賣餅爲業因奔於
河中宰相崔沆豆盧瓚扈從不及匿之別墅口口搜
索嚴急乃微行入永寧里張直方之家朝貴怙直方
之豪多依之旣而或告賊去直方謀反納亡命賊攻其
第直方族誅沆瓚數百人皆遇害自此賊始酷虐族
滅居人遣使傳命召故相駙馬都尉于琮於其第琮
曰吾唐室大臣不可佐黃家草昧加之老疾賊怒令

誅之廣德公主抱賊刀號咷而謂曰予即天子女不
宜復存可與相公俱死是日併遇害二年王處存合
忠武之師敗賊將尚讓乘勝收京師賊遁去處存不
為備是夜復為賊寇襲官軍不利賊怒京師百姓
迎王師乃下令洗城丈夫丁壯殺戮殆盡流血成渠
九月賊將同州刺史朱溫降重榮十一月李克用率代
北之師自夏陽渡河屯沙苑三年正月敗黃揆於沙
苑遂營乾抗二月賊將林言趙章尚讓率衆十萬援
華州克用合河中易定中武之師戰於梁田坡大敗賊
軍俘斬數萬乘勝攻華州塹柵以環之克用騎軍地
渭北今薛志勤康君立每夜突入京師燔積聚俘級
而旋黃揆奔華州官軍收城四月八日克用合忠武騎

將龐從遇賊於渭南決戰三捷大敗賊軍十日夜賊巢
散走詰旦克用由光泰門入收京師巢賊出師明七
盤路東走關東天下兵馬都監口楊復光露布獻捷
於行在陳破賊事狀巢賊先鋒將孟楷攻蔡州節度
使秦宗權以兵逆戰爲賊所敗攻城急宗權乃稱臣
於賊遂攻陳許營於激水陳州刺史趙犇逆戰敗賊
前鋒生擒孟楷斬之黃巢素寵楷悲惜之乃悉衆攻
陳州營於城北五里爲宮闕之制曰八仙營於是自唐
鄧許汝孟洛鄭汴曾濮徐兗數十州畢罹其毒關東
仍歲無耕稼人餓倚牆壁閒賊俘人而食日殺數千賊
有舂磨皆爲巨碓數百生納人於臼碎之合骨而食其
流毒若是二月李克用率山西諸軍由蒲陝濟河會

關東諸侯赴援涼州三月諸侯之師復集四月官軍敗賊於太康俘斬萬計收其四壁又敗賊將黃鄴於西華收其壁巢賊大恐收軍營於故陽里官軍進攻之五月大雨震電平地水深三尺壞賊壘賊自離散復聚於尉氏逼中牟翌日營泚水北是夜復大雨震電溝塍漲溢賊分寇泚州李克用自鄭州引軍龍襲擊于大敗之獲賊將李周場景彪衆保柘縣寃旬官軍追討賊無所保其將李謹楊能葛從周張歸厚張歸霸各率部下降于大梁尚讓率部下萬人歸時溥賊自相猜間相殺於營中所殘者口中夜遁去克用追擊于至濟陰而還賊散於口鄆界黃巢入泰山徐師時溥遣將張友與尚讓之衆掩捕之至狼虎谷巢將林言

斬巢及二弟鄴揆等七人首并妻子函送徐州

秦宗權者許州人爲郡牙將廣明元年十月巢賊渡淮而北十一月中武軍亂殺其帥薛能是月朝廷授別校周岌爲許帥初軍□□□宗權因調發至蔡州聞府軍亂乃閱集蔡州之兵欲赴難俄聞府主殂周岌未至巢賊充斥日寇郡□宗權乃督勵士衆登城拒守洎岌至即令典郡事天子奉蜀姑務翦寇上蔡有勁兵萬人宗權即與監軍楊復光同議勤王出師破賊□□□□□仍置節度之號中和三年巢賊走關東宗權逆戰不利因與□□爲次四巢賊既誅宗權復熾僭稱帝號補署官吏遣其將秦彥亂江淮秦賢亂江南秦誥陷襄陽孫儒陷孟洛陝號至於長安張

旌陷汝鄭盧塘攻汴州賊首首標銳慘毒所至屠殘
人物燔燒郡邑西至關內東極青齊南出江淮北至
衛滑魚爛鳥散人煙斷絕荆榛蔽野賊既乏食啖人
爲儲軍士四出則鹽屍而從關東郡邑多被攻陷唯
趙犇兄弟守陳州朱溫保汴州城門之外爲賊疆場
汴帥與兗鄆合勢屢敗賊軍兗勢日削龍紀元年二
月其愛將申叢執宗權搥折其足送於汴朱溫出師
迎勞接之以禮謂之曰下官屢以天子命達於公如
前年中翻然改圖與下官同力勤王則豈有今日之
事乎宗權曰僕若不死公何以興天以僕勸公也略無
懼色乃檻送京師昭宗御延喜樓受俘京兆尹孫揆
以組練磔之狗於兩市宗權檻中引頸謂揆曰尚書

通紀卷第十一
明鑒宗權豈反者耶但輸忠不効耳衆大笑與妻趙氏俱斬於獨柳之下

通紀卷第十一